



14. april 2010

Inatsisartut suleriaasianni § 36, immikkoortoq 1 naapertorlugu matumuuna imaattumik
Naalakkersuisunut apeqquteqarpugut:

Apeqput: Qeqertarsuaq talittarfeqarnikkut Naalakkersuisut qanoq pilersaaruteqarfigaat?

(Inatsisartuni ilaasortat Finn Karlsen, Siverth K. Heilmann, Knud Kristiansen, ATASSUT)

Tunngavilersuut:

Kalaallit Nunatsinni inuussutissarsiutinik siuarsaanissaq Inatsisartuni partiit tamatta tamaviaarutigipput qularutissaanngilaq. Taamaattorli assartuinikkut periarfissat sumiiffipassuarni ajorluinnarnerisa kingunerisaanik suliffeqarfait nioqquṭissiorermik suliaqartut pilersinneqartartut nioqquṭissiamminnik siammarterisinhaassuseqarnerisa killeqarnerisa kingunerisaanik ipitiinnarneqartarnerat illersorneqarsinnaajunnaartoq ATASSUT-mit isumaqarpugut.

Pisoq kingulleq Inatsisartuni partiit tamarmik nalunngilaat, tassalu imermik nioqquṭissiorfik Greenland Spring Water Qeqertarsuarmiittooq nalunaarpoq assartuinermut periarfissat iluarsiivigineqanngippata allatut ajornartumik suliffeqarfik uniinnartariaqalersinnaasoq.

Imeq nunarsuarmi eqqiluinnerpaaq aammalu mamarnerpaaq tassani nioqqutissiarineqarpoq nunatsinnilu nioqqutissaq taanna assut ilassilluarneqarpoq, ATASSUT-millu qularutiginngilarput pilertoqisumik avammut tunisassiarineqarnera annertusarneqalersinnaasoq assartuinermut akimmiffissalorsorneqanngikkuni.

Taassuma saniatigut aalisakkanik suliffissuaq Royal Greenland A/S tunisassianik inerisaanissaminut akimmiffissaqartinneqartuassaaq Qeqertarsuarmi talittarfik umiarsualivimmik pissutsinut naleqquttumik taarserneqanngippat.

Tamanna tunngavigalugu ATASSUT-mit paaserusupparput siunissaq qanittoq eqqarsaatigalugu Qeqertarsuarmi talittarfiup umiarsualivinngortinneqarnissaa pillugu Naalakkersuisut pilersaaruteqarnersut.

Inussiarnersumik inuulluaqqusilluta

ATASSUT sinnerlugu Inatsisartuni ilaasortat